

I Beograđani se prisjetili ubijenih Sarajlija: U Bosni nije bio građanski rat, već agresija

06/04/2012 21:30 by Administrator

Milošević i Tuđmanov režim pokušali su BiH podijeliti između Srbije i Hrvatske. Povodom obilježavanja 20. godišnjice od početka agresije na BiH, održani su mirni protesti u Beogradu. Dvadesetak aktivista Inicijative mladih za ljudska prava dijelilo je razglednice na kojima su ispisane izjave građana opkoljenog Sarajeva i

držalo transparente sa imenima gradova u kojima su počinjeni zločini, kako bi podsjetili Beograđane na 11.542 žrtvu iz Sarajeva.

Tokom četiri godine opsade Sarajeva ljudi koji su živjeli u tom gradu nisu imali struju, vodu, gas, a bili su zasuti granatama. Danas, 20 godina kasnije, u Srbiji se o tome ne zna dovoljno, a najčešće se svako spominjanje opsade Sarajeva i dalje percipira kao izdaja Srbije i srpskog naroda - kaže Maja Mišić, iz Inicijative mladih za ljudska prava, prenosi "24sata.rs"

Protest su na Trgu Republike održale i članice organizacije "Žena u crnom", poručivši kako žrtve ne smiju biti zaboravljene.

Aktivistkinja organizacije Snežana Tabaković rekla je novinarima da rat u Bosni nije bio građanski rat, već agresija režima Slobodana Miloševića i Franje Tuđmana na nezavisnu Bosnu i pokušaj da se ta zemlja podijeli između Srbije i Hrvatske. - Ne smijemo zabijati glavu u pijesak, treba se suočiti s onim što se dogodilo, kako se slična stradanja u drugim okolnostima ne bi ponovila, rekla je Tabaković.

Aktivisti "Žena u crnom" držali su transparente na kojima su bili ispisani gradovi i mjesta gdje su počinjeni zločini nad Bošnjacima, Hrvatima i Srbima.

Izvor vijesti: Dnevni Avaz